

ROMANTHEK

Shii Phaul Re-è Jigigam

Yaophi

Phaul pha jigigam hì ne Romanthek è Phaul shii wuii ne Roman hà charch rab pha phak bo è yao. Ai muphak ne Masipho duchoi shii blia rek pha now ne iujia ishak chiihphado, ai bow rog shii, Sphain hà wuii pha yang.

Ai mizey hì ne Masiphothek migi ro miigao ji yao ne zey phi chiih-è Masipho ro blia rek pha ji ne chai Chiang shii um ro. Hì pha jigigam shii ne Phaul ro mua pha zab miyao um ro.

Chiihphado shii Roman pha charch pha brantheK shii ilab rek ched ne ai è ithek shii sia phi pha ji ithek shii yao, Phaul è jigigam pha miyao ji yao: “Muawie ji è thieg yi Hamangkhung-aphuii è brantheK shii khi-èrek ne awai rog shii rangsua è ruii: Hì ne igobi è yie ne iidoh thog pha migi è ro” (1:17).

Chiihphado Phaul ji pha Chiang ji huak now. Zab pha brantheK shii, nyi manyi JewishtheK nane GaibrantheK shii Hamangkhung-aphuii rog shii rangsua ruii chid phro, chiih-è zab pha ò shii ne layog pha blu bucho hà ro. BrantheK ne Hamangkhung-aphuii rog shii rangsua ruii pha ne Isu Masi ro migi ji è rey ro. Dinpha Phaul ro miyao ne chai wo yi Masi rog shii ò rek ne ji è phua ne Hamangkhung-aphuii rog shii siangthang rey ro. Migipho ne Hamangkhung-aphuii rog shii liijiing um ne Hamangkhung-

aphuii pha Ragung è Layog nane iy pha blu è ichad rek phi. Muyua 5-8 shii Phaul è de Migipho chai pha Hamangkhung-aphuii ro Iphey nane Hamangkhung-aphuii ro Ragung pha blu Chiang shii mulo. Chiihphado guaphasamoy è musai rog shii rai ne Jewishthek nane Gaibrantek ne nyie khi-èrek ne Hamangkhung-aphuii è phak pha brantek rog shii khriig mage phlei. Phaul è thiichiih shii jong Jewishthek è Isu shii snai pha ji ne Hamangkhung-aphuii ro muphak ne zab brantek shii Isu Masi hà Hamangkhung-aphuii ro bushun thog yi, chiih-è ai ne migi rek Jewishthek ne idang Isu Masi shii asnai phro. Idohhè shii Phaul è Masipho chai ne khi-èrek ne sieng chid pha ji zey, zab è miigak ne gai rog shii khi-èrek ne miie pha Chiang shii zey. Ai è Hamangkhung-aphuii ro blia rek pha muyua ji yie, Masipho ne soh shii nane nawaithek chung blia rek chid phro, chiih-è khi-èrek ne gethek lubu shii masipho duiine now chid. Ai è jigigam yi awairo mua nane Hamangkhung-aphuii Chiang pha miyaogamthek rog shii jongmuui.

Iliing shii um pha ji

Yaophi pha nane Chiang shii (1:1-17)

Hamangnyiak pha brantek ne giawo chid (1:18; 3:20)

Giawo pha Hamangkhung-aphuii ro lumuii (3:21; 4:25)

Masi shii iwo chai (5:1; 8:39)

Israel shii Hamangkhung-aphuii ro phak (9:1; 11:36)

Masipho ro chai pha Iphey (12:1; 15:13)

Jong pha nane hanyiehanyie ro salamthek

(15:14; 16:27)

¹ Phaul è, Masi Isu ro khiao nane guaphasamoy gua chiih-è Hamangkhung-aphuii ro Mua Wie ji yua pha gua ne ho.

² Mua Wie ji ne buyo è Hamangkhung-aphuii pha chaigthek Chiang è sbang rekjong, ji duiine gangthek jigigamthek shii de zey ne um ro. ³ Hi ne gathek ro Ithong Isu Masi, airo Dufuii Chiang ro: ji duiine airo siu de, ai ne Dawid ro riing è giak; ⁴ Airo ragung pha so pha bohblu è ne, ai iy ne sieng pha ji è ai ne Hamangkhung-aphuii Dufuii rone doh yi. ⁵ Ai Chiang è Hamangkhung-aphuii è gu shii Masi Chiang shii guaphasamoy pha chua phi, ji è sohthek pha zab pha branthek migi nane nuui ro. ⁶ Rom hà hanyie um pha hì de lao ne, hanyie shii Hamangkhung-aphuii è Isu Masi ro rey pha ho ro.

⁷ Chiih-è Rom hà nathek zab shii gu è zey hanyie shii Hamangkhung-aphuii è miie ne awai ro bran re yi pha ho:

Hamangkhung-aphuii gethek Aphuii nane Ithong Isu Masi è nathek shii bushun nane liijiing phi bo.

Laso phi pha misia

⁸ Igobi, gu nathek zab shii Isu Masi Chiang è Hamangkhung-aphuii beng shii laso phi, nyieli-ieshii zab pha sohjambling è naro migi ji yoi ramuii ro. ⁹ Hamangkhung-aphuii ne guro khagi ro ji è gu nyie yao pha ji ne izai ro—Hamangkhung-aphuii hanyie shii guro zab lubu rog shii blia rek chiih-è Mua Wie yua pha ji ne ai Dufuii Chiang

shii ro. Hamangkhung-aphuui ne thieg gu nathek shii nowkhlei ¹⁰ idang pha ishak gune sia. Gune Hamangkhung-aphuui shii airo wie ji iidohè shii gu shii rab mua srane thuh nathek shii wuii mua din pha ji lia. ¹¹ Gune nathek shii bajo riig yang pha now ro, chiih-è nathek shii gang rey yi pha ragung khirzey ji thang pha now ro. ¹² Gu è nyie yao pha ji ne gu nane nathek ne gethek chung ò ishak shii nong rai pha rek bo, nathek ne gathek migi Chiang è chiih-è gu yi nathek migi Chiang è ro.

¹³ Nathek now bo, guro khuiinothek nane bu-muiithek, gu è nathek shii wuii pha bajo phak, jishii idang nyie pha lei rey dun. Gu ne Gaibranthek pha duchoi hà de blia rek pha duiine, gu nathek duchoi shii de migi arekpho shii de yang mua ne noh pha now ro. ¹⁴ Chiih-è gune zab pha bran ro blia rek chid pha um ro, thiig shii nane jabiing shii, jigigampho shii nane jigigam azey pho shii de ro. ¹⁵ Ji-è, gune Mua Wie ji ne nathek hanyie Rom shii rai pho shii yua pha bajo yang muii ro.

Muawie pha blu

¹⁶ Gune Muawie shii awo ro; hì ne Hamangkhung-aphuui ro blu è hanyie migi rek pho shii zab ragia rek phi, chiih-è igobi shii Jewthek nane Gaibranthek shii de khagi rek phi. ¹⁷ Muawie ji è Hamangkhung-aphuui ne branthek awai rog shii khi-èrek ne rangsua ruii pha ji dong phi: hì ne migi è igobi è yie ne jao pha nane jongdang pha ro. Jigigam shii yao, “Branthek hanyie yi migi ji è Hamangkhung-aphuui rog shii rangsua è rai phane sieng phro.”

Bran ro ichiig

¹⁸ Hamangkhung-aphuii ro lijieg ne Hamangkhung è zab layog nane buii brantheek chiih-è izai thieg pha ji shii gak pho shii de dong ne gidieg rek ruii phro. ¹⁹ Hamangkhung-aphuii è ithek shii lago phi, nyieliieshii nyie thieg mua pha ji ne Hamangkhung-aphuii è ithek shii miang phi ro. Miang ne Hamangkhung-aphuii awai miirab ro. ²⁰ Hamangkhung-aphuii è sohjambling nyarab dang ne, airo adoh pha muna nane, airo idang pha blu chiih-è airo hamang pha so è ne, wie sang è doh jong ro; ithek ne hì pha manathek ne Hamangkhung-aphuii miirab ji è than ro. Ji-è jithek pha brantheek è khlam pha ji ne arey sha phro! ²¹ ithek ne Hamangkhung-aphuii shii thieg, jishii ithek ne ai è rey pha aishii ne ilab aphi, chiih-è ithek ne aishii laso de aphi. Ji phachiang, ithek munow ne zab khani oi pha rey dun, chiih-è ithek ro khani isloi jine zab igiia è ledun ro. ²² Ithek è awaithek shii ithek ne bajo id ro yao, jishii ithek ne bi-ìethek ro; ²³ jishii ithek khuchung de a-iy pha Hamangkhung-aphuii shii sia pha khalo shii, ithek ne jangbang è rab pha bran iythek fuiithek ibeythek nane phamthek shii sia ne rai.

²⁴ Chiih-è ji è Hamangkhung-aphuii è ji pha brantheek shii ithek lubuthek shii izia khama rek yang pha ji ithek shii zab phi ne rek yi, chiih-è ithek awaithek chung biwo de rek rai. ²⁵ Ithek isbang Hamangkhung-aphuii shii de biidiie hà zia muii; Rab phi pho hanyie shii idang chiong chid ne sia pha khalo shii Hamangkhung-aphuii miirab jishii sia ne rai! Amen.

²⁶ Nyieliieshii ithek jithek rek, ji è Hamangkhung-aphuui è biwo yi ithek lakhung shii phi muui. Hò-amuui rang de Iphey shii arai pha thoh muui srane gai rog shii siulao rek. ²⁷ Ji duiine hò-aphuiithek è de awaithek yiy rog shii zen ne men rai pha ji è de thoh muui srane gai bimithek rog shii men ne lua. Hò-aphuiiphiing de awaithek chung biwo rek rai, chiih-è iidoh shii awai michid ne rek pha asi pha blia ji è ithek lakhung shii lago muadun.

²⁸ Nyieliieshii ji pha branthek ne Hamangkhung-aphuui ro isbang ji khani hà ruii pha anuii, Ai è ithek lakhung shii awie pha khani phi, ji è ithek ne arek pha blia ji rek. ²⁹ ItheK ne zab pha awie, buii, giichak chiih-è awie pha è ledun; ithek ne ley miegriie, sgoh, mak, biidiie nane diig phi pha ji è leydun. ItheK mulo rai ne ³⁰ awaithek chung buii yao rai; ithek ne Hamangkhung-aphuui shii khiijai, lubusai, wiangwe, chiih-è nyigodog rek; ithek dinne de buii blia rek pha lumuii now ba; ithek awaithek aphuii-amuiithek miyao anuii pha rek;

³¹ ItheK shii now pha khani oi; ithek awaithek sbang shii aruii, chiih-è ithek è gaithek shii de bushun arek chiih-è amiie. ³² Hanyiethek ji pha lumuii shii rai pho ne iy ruii phrone Hamankhung-aphuui Iphey jine thieg. Jishii thuh shii ithek hì pha blia awaithek jia mirek asi pha, gaithek shii de yao srane rek ba yi.

2

Hamangkhung-aphuui ro chua

¹ Nathek, gu ijak, gaithek shii chua habey? Nathek shii khuchung magunde akhung phro, nathek hanyie magunde, nathek gaishii chua arone nathek ji duiine rek ara ro, nawaithek shii the ara ro. ² Gethek ne thieg Hamangkhung-aphuii ne branthek nyie rek pha ji shii chua pha ji ne rangsua chak ro. ³ Jishii nathek, gu ijak, nathek ji è rek pha blia rek srane gaishii the ne nathek Hamangkhung-aphuii ro chua pha ji è yo mua phro è now ne bey? ⁴ Din ne nathek airo boh bushun, zudphi, jum jishii ne snai muii, nathek ne thieg Hamangkhung-aphuii ne bushun ro, nyieli-ieshii ai ne nathek shii layog è khid yi pha bidiang muii ro. ⁵ Jishii nathek ro thua nane lawasdai lubu ro, ji è nathek ne Hamangkhung-aphuii ro lijieg chiih-è giang chuathék pha Inai thog ruii pha ji è bajo nawaithek shii lago khrab ramuii ro. ⁶ Hamangkhung-aphuii è zab pha branthek shii awaithek è nyie rek pha ji duiine lasen phi ruii phro. ⁷ Giak branthek ne wie rekramuii ro, chiih-è biisiie shii sow muii ro, nuii, chiih-è idang pha chai sow; jipho shii ne Hamangkhung-aphuii è idang pha chai phi ruii phro. ⁸ Giak branthek ne nyie asi pha ji shii nuii ne giichak pha rangsua shii ne snai mua; ithek shii ne Hamangkhung-aphuii ro lijieg pha ji thoi ne mua ruii phro.

⁹ Zab hanyie è buii rek pho ne thiisa hà diig srane riie ruii phro, chiih-è igobi shii Jewthek chiih-è Gaibranthek shii de ro. ¹⁰ Jishii Hanyie è wie rek pho shii ne Hamangkhung-aphuii è biisiie, ilab, chiih-è liijiing phi ruii phro, igobi Jewthek shii chiih-è Gaibranthek shii phi ruii

phro. ¹¹ Hamangkhung-aphuui è zab shii ò chua ruii phro.

¹² Gaibrantek shii ne Moses ro Iphey oi ro; ithek layog rek ne Iphey è yo rey dun phro. Jewthek shii ne Iphey um ro, ithek layog rek arone Iphey è chua ruii phro. ¹³ Ji-è bran ne Hamangkhung-aphuui rog shii giang ruii pha ji ne, Iphey nuii pha Chiang è asi ro, Jishii Iphey shii nyie yung pha ji rek pha ji re-è ro. ¹⁴ Gaibrantek shii ne Iphey oi ro; Iphey oi magunde, jishii Iphey shii nyie yung pha ji duiine rek pho jine awaithek Iphey ro. ¹⁵ Iphey shii nyie yung pha ji ne ithek lubuthek shii zey ne um rone, ithek mirek ji è doh yi. ItheK è de hì ne izai chak rone doh yi, ithek lubunow ne sak shii ithek shii nin chiih-è sak shii ragia rek phi. ¹⁶ Chiih-è jiè gu muyua pha Mua Wie ji duiine, Isu Masi Chiang è Hamangkhung-aphuui è ug pha nowthek è chua pha Inai thog ruii phro.

Jewthek nane Iphey

¹⁷ Nathek Chiang nyie lei? Nathek nawaithek shii Jewthek ro è yao; nathek ne Iphey shii luthong chiih-è Hamangkhung-aphuui Chiang shii nyigodog rek; ¹⁸ Hamangkhung-aphuui è nathek shii nyie rek bo è yang pha ji ne nathek ne thieg, chiih-è nyie izai ji gua pha ne ithek ne Iphey è dab jong; ¹⁹ Nathek è miégthi shii doh yi pha ji ne izai chak, chiih-è hanyie ne igiia shii um pho shii isang phi,

²⁰ Chiih-è nathek bi-ìethek shii yua, chiih-è nathek ne snai pho shii yua pha masdo ro. Nathek shii ne Iphey umjong ne izai nane khani ne zab le

zanjong ro. ²¹ Nathek ne gaithek shii yua—nyie rek ne nawaithek shii ayua lei?

Nathek è yua, “Mugo agow rabo—Jishii nawaithek ne mugo nebey? ²² Nathek è yao,” “Siulao arek” jishii nathek ne siulao rek nebey? Nathek ne jangbang shii zia than, jishii nathek ne Misi-ahòthek shii rio nebey? ²³ Nathek Hamangkhung-aphui ro Iphey shii nyigodog rek—jishii nathek ne Iphey chui srane Hamangkhung-aphui shii biwo rey yi nebey? ²⁴ Jigigam shii yao, “nyieli-ieshii Jewthek nathek Chiang è, Gaibranthek ne Hamangkhung-aphui shii buii yao.”

²⁵ Nathek Iphey ji nuii arone, nathek è mi-giangkheg pha ji ne igong chak ro; jishii nathek è Iphey anuii ji arone, nathek Migiang-akheg liak pha ji wie ro. ²⁶ Gaibranthek arone, hanyie è Migiang-akheg ba pho è, Iphey shii yung pha ji nuii ne de, Hamangkhung-aphui è aishii ne Migiang-akheg ba rone achoi phi nebey? ²⁷ Chiih-è nathek ne migiangkheg jong pha jigigam zey ne ruii magunde; nathek Jewthek ne Gaibranthek Chiang è nathek shii the ruii phro nyieliieshii nathek è Iphey shii chui muii, chiih-è ithek yi siu è Migiang-akheg magunde, jishii ithek ne Iphey nuii phro. ²⁸ Zab pha iidohè shii, Jew isbang ne hanyie, izai migiangkheg pho ji bey? Jine Jewthek bran asi ro hanyie yi fuang hà doh yi ne hanyie yi siu shii kheg bie. ²⁹ Jishii de hanyie yi iling pha Jewthek arone jine Jew isbang ro, hanyie lubu yi khegjong pho ne chiih-è hì ne Hamangkhung-aphui ro ragung blia ro, chiih-è Iphey zey pha ji è asi ro. Ji è rek pha branthek ne bran è amua pha,

Hamangkhung-aphuii è chiong mua ruii phro.

3

¹ Nathek Jewthek ne Gaibranthek è muna phua nebey? Din ne ithek è kheg pha jishii ne phua um bey? ² Hì ne bajo miigak ro, zab pha lumuii shii, igobi pha ithua shii, Hamangkhung-aphuii è awairo mua ne Jewthek shii migi rek. ³ Jishii giak bran yi isiie arek arone nyie rey mage phlei? Ji pha miyao è Hamangkhung-aphuii ne isiie asi bey? ⁴ Khuchunde asi phro! Hamangkhung-aphuii ne izai ro, jigigam shii yao pha duiine. Zab pha branthek rang de biidiie ro,

“Nathek è yao shii nathek ro izai doh ruii phro.”

“Nathek bidiang shii nathek ro maley ne yang ruii phro.”

⁵ Jishii gethek mirek pha asi pha blia ji è Hamangkhung-aphuii ne rangsua rek rone muna adoh yi bey? Ai è gethek shii lagoon phi mage shii Hamangkhung-aphuii ne asi rone nyayao mua nebey? (Hì ne isbang pha musai chak ro.)

⁶ Khuchunde asi phro! Hamangkhung-aphuii è achua arone, nyie khi-èrek ne sohjambling shii chua mage phlei?

⁷ Jishii gethek ro blia Hamangkhung-aphuii biisiie shii biidiie arone airo izai muna san rey dun nebey? Nyie rek ne gune layogpho shii the bamuii lei? ⁸ Nyie rek ne ayao lai? Chiihphado, “Ji-è cho gethek ne wie thog yi pha buii rek habey” Zai, giak branthek ne gu shii makhak-riing ne jithek yao ne the muui ro! Ithek shii rey pha um pha ji ne, ithek shii ne the ruii phro.

Hanyie jia de giang asi ro

⁹ Chiihphado wie ro, Jewthek gethek ne Gaibranthek è de wie ba bey? Khuchung de asi phro! gune doh jong ro Jewthek chiih-è Gaibranthek ne layog pha blu iliing shii um ro.

¹⁰ Jigigam shii yao;

Hanyie jia de giang oi ro,

¹¹ Hanyie de khua oi ro

dinne Hanyie de Hamangkhung-aphuii shii sia pha bran oi ro.

¹² Zab pha branthek ne Hamankhung-aphuii è khid dun ro;

ithek zab ne buii rey dun ro;

nyie izai ji ne hanyie de arek ro, jia rang de arek ro.

¹³ Ithek miyaogamthek ne zab awiedang pha khlam ro;

ithek ri ne biidiie yao bie phro,

chiih-è buii rek, ithek ri ne idiig um pha pham duiine ro;

¹⁴ ithek miyao ne zab awie pha thamai pha ro.

¹⁵ Ithek ne gaishii diig phi chiih-è ua pha now;

¹⁶ ithek khi hà wuii magunde awie pha rek ne muadun phro.

¹⁷ Ithek ne liijiing pha lumuii ne athieg ro,

¹⁸ “chiih-è ithek ne Hamangkhung-aphuii shii rum pha adab ro.”

¹⁹ Thuh gethek ne thieg sha hanyie Iphey nuii ne rai lei ne zab Iphey è yao ruii, ji è zab branthek shii khung pha gak srane, chiih-è zab pha sohjambling ne Hamangkhung-aphuii pha chua pha miie shii yi bo. ²⁰ Iphey shii chid pha duiine hanyie jia de Hamangkhung-aphuii mieg shii giang arey

phro, Iphey è branthek layog rek rone doh yi phro.

Khi-èrek ne gethek ne Hamangkhung-aphuii rog shii giang ruii

²¹ Jishii thuh Hamangkhung-aphuii è branthek shii awai rog giang ruii pha dong phi ro. Hì ne Iphey rog nyie arek chid phro, Moses nane chaigthek è hì ne izai rone doh yi.

²² Hamangkhung-aphuii è branthek shii giang ruii pha ji ne ithek è Isu Masi shii migi rek pha ji è ruii phro, Hamangkhung-aphuii è hìthek zab rek pha ji ne hanyie è Isu shii migi rek pha ji è ro nyieliieshii nyie de yo asi sha ro:

²³ Zab pha bran è layog rek chiih-è Hamangkhung-aphuii ro biisiie è ruang dun marui. ²⁴ Jishii Hamangkhung-aphuii è bushun ley phi srane hanyie è gethek shii layog è khia phi pha, Isu Masi Chiang è awai rog shii giang rai noh. Chiih-è hanyie è ithek shii sey phi.

²⁵⁻²⁶ Hamangkhung-aphuii aishii ne phi, ji è phi ne iy pha ji ne branthek migi è ithek layog ne khung ge ro. Hamangkhung-aphuii ne giang chak rone doh yi pha ji rek phi. Igobi è ai ne jum nane branthek layog shii sasab arek ro; jishii thuh pha ishak shii giang chak rone doh yi pha ai è ithek layogthek rog shii rai. Ji duiine Hamangkhung-aphuii è awai shii giang rone doh yi chiih-è hanyie Isu shii migi rek pho izai chak rone yao.

²⁷ Chiihphado nyie, gethek ne oi pha ji shii de nyigodog nyarek nebey? Chiih-è hì ne nyie Chiang è lai? Hì ne gethek è Iphey nuii pha

ji bey? Asi, jishii gethek è migi rek pha ji ro.
²⁸ Gune hì de yao Hamangkhung-aphuii rog shii
 branthek giang ruii phane ithek ro migi ji è phro,
 chiih-è Iphey shii nyie yung pha ji è arek phro.
²⁹ Din ne Hamangkhung-aphuii ne Jewthek ro
 Hamangkhung-aphuii bie bey? Ai yi Gaibranthek
 ro Hamangkhung-aphuii pha asi bey? Ai ne gai
 ro de chak ro. ³⁰ Hamangkhung-aphuii ne jia bie
 ro, chiih-è ai ne Jewthek shii awaithek migi ji è
 awai rog shii giang ruii phro, chiih-è Gaibranthek
 shii de ithek migi ji è awai rog shii giang ruii phro.
³¹ Gethek rek pha hì pha isiie ne Iphey rog thaluii
 rey phrone yao nebey? Asi, zab asi; ji pha Chiang
 shii gethek ne Iphey shii chuh kho chid.

4

Abraham ro miiriig

¹ Gethek nyie yao muluii, chiihphado, gethek
 ro riing Abraham aphuii shii? Ai mirek ji nyie
 ga? ² Ai mirek pha ji è de ai yi Hamangkhung-
 aphuii rog shii giang rey ne rai arone, ai de
 ùjia ne nyigodog rek iwa, jishii Hamangkhung-
 aphuii mieg miie hà asi iwa. ³ Jigigam shii yao,
 “Abraham è Hamangkhung-aphuii shii migi rek,
 chiih-è nyieliieshii airo migi ne Hamangkhung-
 aphuii è giang hà choi phi. ⁴ Branthek hanyie
 è blia rek pha ji ne riinangthek mua ruii phro,
 jishii jine ley phi pha asi ro, ithek è wiang ne rek
 ne ji è mua ro. ⁵ Bran hanyie è awai migi shii
 luthong ne; awai blia shii aluthong rabo; chiih-
 è hanyie è biidiie chiih-è izai shii yao thieg pha
 Hamangkhung-aphuii shii migi rek pho ne, airo

migi shii Hamangkhung-aphuii è yi ne sasab rek srane aishii ne giang è awai rog shii ruii muii.

⁶ Hamangkhung-aphuii è branthek hanyie yi blia rek pha ji è asi pha migi Chiang è giang rone choi phi pha ji shii ne Dawid è de wie rone yao ro.

⁷ “Sang pho ne hìthek ro hanyie ro biidiie blia nane layog shii khung phi!

⁸ Sang pho ne hìthek ro hanyie ro layog shii Ithong è sasab aruii!”

⁹ Dawid miyao pha sang pha ji ne migiangkheg pho ro bie bey? Khuchung magunde asi ro! Hì ne Migiang-akheg ba pho shii de ro. Ji è gethek ne jigigam shii thieg jong, “Abraham è Hamangkhung-aphuii shii migi rek, chiih-è nyieliieshii airo migi è Hamangkhung-aphuii è aishii giang ro è choi phi.” ¹⁰ Hì pha ishak ne khuchung ga? Hì ne Abraham è Migiang-akheg ba pha ibi ba asi iidoh shii ba? Hì ne ibi hà ro, iidoh hà asi ro. ¹¹ Ai ne iidoh hà migiangkheg ba, chiih-è ai migiangkheg pha ji ne nyieliieshii ai migiang-akheg ba pha ibi shii airo migi jishii Hamangkhung-aphuii è giang rone nuii phi pha cheb ro. Chiih-è ji è Abraham ne zab hanyie è Hamangkhung-aphuii shii migi rek ne chiih-è ai è giang ro è nuii phi pho pha ragung aphuii ro. ¹² Ai ne Migiang kheg pho ro aphuii de ro, ji ne, hanyie è migiangkheg pho rog cho gieng shii de ro, chiih-è gethek ro aphuii Abraham è Migiang-akheg ba pha ibi shii sieng pha duiine migi pha ò chai shii sieng pho ro de aphuii ro.

Hamangkhung-aphuii ro sbang ne migi è mua ro

¹³ Hamangkhung-aphuii è Abraham nane ai riingthek shii sohjambling ne zab ai ro rey phrone sbang phi, ai è ji è rek phi, nyieliieshii Abraham è Iphey nuii rone asi ro, jishii nyieliieshii ai è migi rek chiih-è Hamangkhung-aphuii è giang rone choi phi. ¹⁴ Hanyie è Iphey shii nuii bie ne Hamangkhung-aphuii ro sbang ji zab rey arone branthek ro migi ne adubo ro chiih-è Hamangkhung-aphuii ro sbang ne adunmey pha rek dun phro. ¹⁵ Iphey è Hamangkhung-aphuii ro lijieg yi phro; jishii Iphey oi bsa ne, Iphey anuii pha arek phro.

¹⁶ Chiih-è sbang ne migi lakhung shii mua ruii phro, ji è sbang ne Hamangkhung-aphuii è zab pha Abraham riingthek shii de phi, chiih-è Iphey nuii pho shii asi bie pha, jishii Abraham duiine hanyie è migi rek pho shii de ro. Nyieliieshii Abraham ne gethek zab pha ragung aphuii ro;

¹⁷ Jigigam shii yao, Gu na shii bajo soh pha aphuii rab phi pha ro, Hanyie è iy pha ji è hòì din yi, chiih-è ai è yung mage ne nyie arey pha ji de rey yi, Abraham è Hamangkhung-aphuii shii migi rek ji è sbang ne Hamangkhung-aphuii mieg moe shii wie ro.

¹⁸ “Abraham è migi rek ne chiih-è luthong, thiisa hà luthong chid pha nyie miyao oi shii pha rangde luthong, ji è ai ne bajo thiig pha aphuii rey dun.”

Jigigam shii yao pha duiine, “Naro riingthek ne dadiangthek duiine rey ruii phro.” ¹⁹ Ai ne idam wieng jia rey sha; jishii ai iy sha pha rek ne Sarah de ani agiak sha pha re ne awai siu è phak ramuii shii isa ro migi ne ù arey ro. ²⁰ Airo

migi jine athoh, chiih-è Hamangkhung-aphuii ro sbang shii biidiie rone anow; airo migi ne blu rog awaishii ley, chiih-è ai è Hamangkhung-aphuii shii laso phi. ²¹ Aishii ne izai è Hamangkhung-aphuii è nyie sbang phi pha ji ne rek mua phi. ²² Jine nyieliieshii Abraham ro migi ji è “Hamangkhung-aphuii è giang rone nuii phi.” ²³ Hi pha miyaogamthek ne, aishii giang rone nuii phi pha hì ne awai ji jia shii azey bie ro. ²⁴ Hi ne gethek hanyie è Ithong Isu ne iy pha ji è hòì din rone migi rek ne giang shii nuii phi pho shii de zey phro.

²⁵ Nyieliieshii gethek layog Chiang è ai iy dun, chiih-è gethek shii Hamangkhung-aphuii rog rangsua ruii pha hòì din phi.

5

Hamangkhung-aphuii rog shii rangsua

¹ Thuh gethek shii migi ji è Hamangkhung-aphuii rog shii rangsua ruii, gethek ne Hamangkhung-aphuii rog shii Ithong Isu Masi Chiang è liijiing um ro. ² Ai è gethek ro migi ji è thuh gethek rai muii pha Hamangkhung-aphuii ro liijiing shii nohjong ro. Ji è gethek ne Hamangkhung-aphuii pha biisiie thang pha ji shii luthong ne nyigodog rek phro! ³ Gethek ne ithek ro diigthek shii de nyigodog rek, nyieliieshii gethek ne thieg diig è ne zud rek ruii phro, ⁴ zud ji è ne Hamangkhung-aphuii ro blia doh ruii phro, chiih-è zud ji è luthong rey ruii phro. ⁵ Airo luthong ji ne gethek shii duhug arek phro, jishii Hamangkhung-aphuii è Ragung So yi thaluii

gethek shii phi pha duiine awai ro miie de gethek lubu shii thoi phi. ⁶ Gethek ne arek muluii ba shii, Hamangkhung-aphuii è Masi shii gua ne layog pha brantheek Chiang shii iy yi. ⁷ Giang bran Chiang shii giak è iy phi phane diig ro, hì ne yangne bushun rek ne bran wie Chiang shii nya-iy mua pha de um ro. ⁸ Jishii Hamangkhung-aphuii è gethek shii khama bushun rek phi pha ji ne doh yi, Masi è gethek Chiang pha ishak shii ne gethek ne layogpho shii ba! ⁹ Ai iy phi pha ji ne thuh gethek ne Hamangkhung-aphuii rog shii giang rai mua; chiihphado gethek ne Hamangkhung-aphuii ro lijieg pha ji è din è de bajo khagi rey phro! ¹⁰ Gethek ne Hamangkhung-aphuii ro gidieg ro, jishii ai Dufuii iy pha ji è ai è gethek shii ijak rab phi, thuh shii gethek ne Hamangkhung-aphuii ro ijak ro, ji è gethek ne Masi chai è khama bajo ragia rey ruii phro! ¹¹ Jishii hìthek ne zab asi ro; gethek ne nyieliieshii Hamangkhung-aphuii è Ithong Isu Masi hanyie è gethek shii Hamangkhung-aphuii rog shii ijak rab phi pha ji è nyie rek phi pha ji è de lubo rek bo,

Adam nane Masi

¹² Layog ne sohjambling shii bran jia Chiang è thog, chiih-è ai layog è iy pha ji de awai rog shii yithog. Idohhè shii ne, iy pha ji ne zab pha bran jadtheek shii shiiy dun, nyieliieshii zab pha brantheek è layog rek. ¹³ Iphey phijong pha ibi è layog ne sohjambling shii um. Khi hà Iphey oi jihà ne layog sasab arek. ¹⁴ Jishii Adam pha ishak è yi ne Moses iy pha ji è brantheek shii khohthek.

Jishii zab pha bran hanyie è Adam mirek pha Hamangkhung-aphuii miyao anuii pha arek pho shii de layog è khohthek.

Adam ne jia hanyie wuiiramuii pha jang-bang ro. ¹⁵ Jishii nyi ne ò asi ro, Nyieliieshii Hamangkhung-aphuii ro lei pha lasen Adam ro layog duiine asi ro. Hì ne izai ro, nyieliieshii bran jia layog è bran bajo iy dun. Jishii Hamangkhung-aphuii ro bushun ne muna boh ro, chiih-è airo lei pha lasen ji ne bran jia Isu Masi Chiang è bran bajo shii bushun mua. ¹⁶ Chiih-è ichiih shii ne Hamangkhung-aphuii ro lasen nane bran jia ro layog chung ne yo ro, doh shii layog jia è “Ichiig” chua pha thog; jishii doh hà bajo layog yi lasen hà wuiithok ne, “Ichiig oi sha ro!” ¹⁷ Hì ne izai ro, bran jia layog ji è nyieliieshii iy phane jao ne rangsua rek. Ji è iidoh shii bran jia Isu Masi Chiang lasen boh mua ruii phro! Chiih-è zab hanyie è Hamangkhung-aphuii ro ley bushun nane Isu Masi chai Chiang è lei ai rog shii khohthek ruii phro.

¹⁸ Ji-è chiihphado, layog jia è zab pha bran shii the, ji duiine giang jia è zab pha brantheek shii thoh phi srane chai phi. ¹⁹ Chiih-è nyieliieshii bran jia è miyao anuii pha rek srane doh ne zab pha bran shii layogphothek rey dun, ji duiine doh ne bran jia miyao nuii srane ithek shii Hamangkhung-aphuii rog giang rai yi.

²⁰ Ichiig ne bajo rey yi pha Iphey doh yi phro; jishii khihà layog bajo rey, Hamangkhung-aphuii ro bushun ne dinne de bajo rey ruii phro. ²¹ Ji-è chiihphado, layog è iy pha ji è ilkhi rek pha

duiine, idang chai hà lua now pha Isu Masi chiang è Hamangkhung-aphuui bushun ne giang hà ilkhi rek ruii phro.

6

Layog è iy jishii Masi rog ò rai arone isieng rai

¹ Gethek nyie yao, chiihphado? Hamangkhung-aphuui ro bushun ne bajo rey yi pha gethek ne layog shii rai habey? ² Khuchung magunde asi, gethek ne layog shii iyjong—chiihphado khi-èrek ne sieng ne rai mua phlei? ³ Nathek ne thiegiang, gethek ne Isu Masi rog shii ò rai pha khowo yi shii, ji è gethek ne ai è iy pha rog shii ò rai pha khowo yijong ro. ⁴ Gethek ro khowo ji re-è, chiihphado, gethek de ai è iy pha ji thang ne ai rog shii wieng muii, Aphuui ro blu biisiie ji è Masi ne iy biisa è dinne hòi pha duiine, ji è gethek de iwo chai shii sieng.

⁵ Ji pha iidoh è ai mirek duiine gethek de ai rog ò jia shii iy, ji duiine gethek de ai mirek duiine ai rog shii chai hòi din. ⁶ Chiih-è gethek ne thieg layog pha blu shii awailum ne mua yi pha, gethek ro ihèg chai ne iy pha rog shii awai ro bai shii ruii, ji è gethek ne dinne bajo layog ro khiao arai sha phro. ⁷ Bran iy mage shii, ai ne layog pha blu è ichad rek phi. ⁸ Gethek Masi rog shii nya iy dang ne, gethek de ai rog shii sieng phrone gethek è migi rek. ⁹ Gethek ne thieg Masi iy ne hòi din chiih-è khuchung de a-iy sha phro—Iy pha ji è ai lakhung shii boh akhoh sha phro. ¹⁰ Chiih-è ji è, nyieliieshii ai iy dun, layog ne ai lakhung shii blu oi sha ro; chiih-è thuh ai ne ò shii chai sieng ne rai pha ji ne

Hamangkhung-aphuui Chiang rai ro. ¹¹ Ji duiine nathek ne iy pha ji shii ne now chid, ji è layog Chiang è ruang rey muii, jishii Masi Isu Chiang è Hamangkhung-aphuui rog shii ne sieng phro.

¹² Ji-è nathek nawaithekhlum ne chid pha ji shii nuii yi pha, Layog ne mua pha siuthek shii khuchung de boh akhoh sha phro. ¹³ Nawairo siu pha ichua ne awie pha blia rek pha layog shii aphi rabo, Jishii, nawaishii ne hanyie yi iy pha ji è chai yi pha duiine Hamangkhung-aphuui shii phi bo, chiih-è nathek ro zab chai shii giangthek bliathek rek pha aishii phi muii bo. ¹⁴ Layog ne nathek ro Ithong arab rabo; chiih-è nathek ne Iphey iliing shii arai ro jishii Hamangkhung-aphuui ro bushun iliing shii ro.

Giangthek ro khiaothek

¹⁵ Nyie, chiihphado? Nyieliieshii gethek ne Iphey iliing shii asi jishii gethek ne Hamangkhung-aphuui ro bushun iliing shii, ji è gethek ne layog rek habey? Khuchung de asi!

¹⁶ Nathek ne hì thieg nathek è giak ro khiaothek rek pha nuii mage shii, nathek ne ithek khiao rey ruii, nathek ne layog pha khiao rek arone iy ruii phro, dinne nuii pha khiao rek arone Hamangkhung-aphuui rog shii rangsua sieng ruii phro. ¹⁷ Jishii Hamangkhung-aphuui shii laso ro! now bo luang jia na de layog ro khiao ro, thuh shii nathek è zab nawai lubu rog shii izaithek ji choi ro. ¹⁸ Nane layog è thoh srane giang pha khiao rey dun ro.

¹⁹ (Gune idang gao pha nyuak è yao nyieliieshii nathek ne agao mua.) Luang jia nathek è de

nawaithek shii awie pha awie shii khiao rek pha nathek è zab phi muii. Ji duiine ithek de thuh shii gang chiih-è giang shii khiao rek pha nawaithek shii zab muii bo. ²⁰ Nathek yi layog ro khiao ba shii, nathek shii ne giang è thoh phi phro. ²¹ Nathek shii wo pha blia rek pha hì ne nathek shii nyie mua lai, iidoh nathek shii ne iy pha ji mua phro! ²² Ji shii thuh nathek ne layog è ichad rek phi chiih-è Hamangkhung-aphuii ro khiao rey sha ro. Nathek è mua pha ne chai ro aishii zab phi muii bo, chiih-è iidoh shii idang chai mua ruii phro. ²³ Layog ne iy pha riinang phi ruii phro; jishii Hamangkhung-aphuii ro lei pha lasen Masi Isu gethek ro Ithong rog shii ò rai yi pha idang pha chai ro.

7

Yiygey pha ji è najang yao

¹ Gu nyie yao ramuii pha ji ne nathek ne gao phro, gu khuiinothek, nyieliieshii nathek zab Iphey ji ne thieg, Iphey ji ne branthek shii kho-hthek pha ji ne ithek sieng ne rai shii kho bie phro.

² Gey dun pha bimi ro miyao duiine, airo gey yi khama sieng ne rai ji nyama thog pha ai rog shii rai pha phang phro; jishii ai iy dun, chiihphado awai gey rog shii phang pha Iphey ne thoh dun phro.

³ Ji-è, gey isieng nya um ba shii ai yi gai rog shii yiygey arone aishii ne siulao pha bran rone ho phro; jishii airo gey yi iy dun arone, ji pha bimi shii ne thaluii thoh muii srane ai ne bufuii shii yiygey magunde aishii ne siulao ayao phro. ⁴ Ji ne khi-èrek ne nathek rog shii um ga, gu khuiinothek.

Bajo igobi è Iphey shii yao jong, nathek de iy dun nyieliieshii nathek de Isu pha siu ro; chiih-è gethek shii Hamangkhung-aphuii ro blia rek yi pha iy ne hòì dìn pha thuh shii nathek ne ai rog shii ro. ⁵ Gethek de ji duiine bran è lajia jishii sieng ramuii shii, gethek ne siu pha blia rekramuii shii Iphey ji è layog è yang pha ji shii khui, chiih-è gethek è rek pha ji ne iidoh shii ne zab iy dun. ⁶ Thuh shii, gethek ne Iphey è thoh rey ge ro, nyieliieshii gethek ne phat heg hà zum ne ruii muii pha ji è ne gethek ne iyjong ro. Iphey shii zey pha ihèg lumuii shii ne muna alua sha, jishii Ragung pha iwo lumuii shii lua.

Iphey nane layog

⁷ Chiihphado, Iphey awai ne layog rone, gethek ne yao habey? Khuchung magunde asi! Jishii Iphey è layog ne nyie ga, jine gu shii thieg yi. Iphey è gu shii ayao arone, Gai ro nyie um pha ji ne agiichak rabo è yao pha ji ne gune athieg mua. ⁸ Jishii layog è chua mua srane yung pha ji è zab pha muna, giichak pha ji ne gu lakhung shii lao mage. Iphey oi arone, layog ne iy dun ro. ⁹ Gune Iphey è yo ba shii ne isieng ro; jishii yung pha ji thog mage ne layog è chai ne sieng dun, chiih-è gune iy dun ¹⁰ chiih-è muyung yi chai yi pha rek shii, gu shii iy pha ji yi phi, chiih-è gune iy dun. ¹¹ Layog è chua doh mage ne, chiih-è muyung è yi srane gu shii ne nyiu ne gu shii ua muii.

¹² Ji-è, chiihphado, Iphey awai ne gang ro, chiih-è muyung ne gang, giang nane wie ro. ¹³ Jishii chiihphado hì-ne wie bey? Gu shii iy yi pha ji ne, khuchung de asi phro! Hì pha layog ne nyie wie

ji è khoh srane rek ne, layog è gu shii iy pha phi ne, izai pha Iphey jine doh yi pha rek. Chiih-è, muyung è layog ne dinne de bajo awie pha layog doh yi.

Gaithek duchoi shii khnaing

¹⁴ Gethék ne thieg Iphey ne giang ro; jishii gune giang bran asi ro, chiih-è layog ro khiao rek pha liu muii. ¹⁵ Gune athieg nyie rek chid pha ji ne, chiih-è gu è nyie rek yang pha ji ne gu è arek, jishii gu è snai muii pha ji shii rek. ¹⁶ Gu è nyie rek pha ji ne gu è arek yang pha ji rek, gune Iphey yi rangsua rone nuii rone doh yi. ¹⁷ Ji-è gune ji asi ro hanyie è ji rek pha ji ne, jishii ji ne gu shii sieng pha layog ji ro. ¹⁸ Gu ne thieg giang arai arone wie ne gu rog shii arai phro, wie rek yang pha gu shii um magungde, gune arek mua ro. ¹⁹ Gu è rek yang pha wie ne gu arek ro, ji pha Chiang shii gune gu è arek yang pha awie pha blia shii rek phro. ²⁰ Gu è nyie arek yang pha ji shii gu è rek arone, hì rek pho ne gu mirek asi pha gai mirek ro, ji è layog gu rog shii rai pha ji ne ro ai Chiang è rey phro. ²¹ Ji-è gu riig shii Iphey ne blia rek, gu è nyie wie ji rek pha now shii, gu mugua ne nyie awie pha ji rey dun phro. ²² Guro iliing è ne Hamangkhung-aphuii ro Iphey shii sang phro. ²³ Jishii guro siu shii ne yo Iphey è blia rek pha doh muii ro-Iphey ji è ne gu khani è nuii Iphey ji shii mak rek muii ro. Layog pha Iphey è gu shii ne phatheg rab srane gu siu shii blia rek muii ro. ²⁴ Gune khi-èrek pha diig bran, Gu shii iy pha jihà noh pha ji è hanyie è gu shii ji pha siu è ragia rek phi phlei? ²⁵ Hanyie è rek pha Ithong Isu

Masi Chiang è Hamangkhung-aphuui shii laso ro, chiihphado, hì ne, guro muphak ro, guiro è gu Hamangkhung-aphuui ro Iphey pha blia gui khani rog shii nya rek mua phro, jishii thuh thog pha gui ro siu miiyang ne layog Iphey pha blia rek phro.

8

Ragung shii chai

¹ Thuh shii hanyie ne Masi Isu rog shii ò rai pho ne the pha oi sha phro. ² Iphey pha Ragung, hanyie è gethek ro chai shii Isu Masi rog ò rai yi muui pha ji è Iphey pha layog chiih-è iy pha ji è thoh phi phro. ³ Nyieliieshii bran ro ziig ne zia buii ne Iphey è arek mua pha ji ne, Hamangkhung-aphuui è rek. Ai è awairo Dufuui thoh pha ji è bran ro ziig pha Layog shii nin, hanyie ne bran ro layog ziig duiine ziig rog shii wuii ne layog shii ruang rek phi. ⁴ Hamangkhung-aphuui è hì rek pha ji ne nyieliieshii Iphey pha giangthek ro gangthek ne bran ziig duiine asi pha hanyie è Ragung duiine rai pho gethek shii zab liingsed yi bo.

⁵ Hanyie yi bran siu duiine rai ai khani shii ne bran siu è nyie yang pha ji rai, hanyie yi ragung duiine rai arone ai khani ne ragung è nyie yang pha jihà rai. ⁶ Hanyie yi bran siu shii rai pho ne iidohè shii ne iy phro; hanyie yi ragung shii rai pho ne iidoh shii ne sieng ne rai chiih-è liijjing mua ruui phro. ⁷ Chiih-è ai bran siu rai arone ji pha bran ne Hamangkhung-aphuui rog shii gidieg rey dun phro; chiih-è ai ne Hamangkhung-aphuui ro Iphey ne anuii mua phro. ⁸ Hanyie è awai ro

bran siu shii nuii pho ne Hamangkhung-aphuui shii sang arek mua phro.

⁹ Jishii nathek ne bran siu duiine arai rabo è yao bo; ji phachiang, shii nathek ne ragung shii rai bo è nawaithek shii yao bo—chiihphado, izai Hamangkhung-aphuui Ragung ne nathek rog shii rai phro. Hanyie shii Ragung oi arone Masi ne ai è asi ro. ¹⁰ Layog è nathek siu iy dun magunde, jishii Masi ithek rog shii rai arone, nathek ragung ne sieng ne Hamangkhung-aphuui rog giang ruii phro. ¹¹ Hanyie yi iy ne hòì din pha Hamangkhung-aphuui ro Ragung yi nathek rog shii rai arone, chiihphado hanyie è Isu shii iy pha ji è hòì phi pha ji ai Ragung nathek shii um pha ji è nathek ro iy pha siuthek shii de chai phi rui phro.

¹² Ji-è chiihphado, gu khuiinothek nane bumui-ithek, jishii bran mizen è yang pha ji gethek ne arai pha, gethek ne hì ne rek chid phro. ¹³ Jishii gethek bran siu duiine rai arone, nathek ne iy ruii phro, jishii Ragung Chiang nathek è layog blia ji iy arone nathek ne sieng phro. ¹⁴ Hanyie shii Hamangkhung-aphuui ro ragung rai chiihphado, ai ne Hamangkhung-aphuui Dufuui ro. ¹⁵ Hamangkhung-aphuui è nathek shii ragung phi pha jine nathek shii khiao rek pha yi pha aphì ro; ji è nathek ne arum chid rabo; ji phachiang shii, ragung è Hamangkhung-aphuui ro ani rab phi phro, chiih-è ragung pha blu ji è gethek ne Hamangkhung-aphuui shii “Aphuui! guro Aphuui rone choh ruii phro!” ¹⁶ Hamangkhung-aphuui ro ragung è gethek ne Hamangkhung-aphuui ro

chak rone yaothieg ne awailum ne gethek ro ragungthek shii rung. ¹⁷ Ji pha iidoh è gethek ne airo ani rey dun, gethek ne ai è awai bran shii ruii phi pha khirzey ji gethek de rangsua rey, chiih-è Hamangkhung-aphuii è aishii nyie ruii phi pha ji ne gethek de rangsua rey dun; chiih-è Gethek de Masi ro diig shii thang gieng arone, gethek de airo biisiie shii thang gieng phro.

Phariang pha biisiie

¹⁸ Gu è now muui ro thuh pha ishak gethek shii nyie diig rek pha ji ne gethek shii dong ruii pha biisiie shii a-ò mua phro. ¹⁹ Hamangkhung-aphuii yi awai ani shii dong ruii pha ji ne zab pha zen è khan ne rai ro. ²⁰ Chiih-è zen è nin ne mua pha rek, jishii awailum ne asi ro, jishii nyieliieshii Hamangkhung-aphuii miyang pha hì è thuh de um rone doh yi. ²¹ Zen awai ne inai jia shii ne mua dun pha khiao è ichad rey srane Hamangkhung-aphuii ro anithek ro biisiie ji thang ruii phro. ²² Gathek ne thieg ji pha ishak è yi ne thuh thog pha zab pha zen pho ne thuh thog pha ani giak pha duiine riie ne ro muui ro. ²³ Jishii hì ne zen pha awai ji jia muro asi ro, gethek hanyie shii igobi Hamangkhung-aphuii ro lasen hèg pha ragung um pho Hamangkhung-aphuii è awai ani rab ne gethek ro zab thoh phi pha ji shii khan pho de ro muui ro. ²⁴ Chiih-è gethek ro Luthong ji è gethek ne ragia rey phro; jishii gethek è luthong pha ji riig arone, ji ne izai luthong asi ro. Nyie gethek è rek pha ji shii ne luthong habey? ²⁵ Jishii gethek ariig pha ji shii luthong arone, gethek ne aishii de jum è khan ara ro.

²⁶ Ji duiine gethek zia arone Ragung è wuii srane nong phi phro. Chiih-è gethek ne sia pha athieg chiih-è miyaogamthek ayao mua pha ro pha ji ne Ragung awai è gethek Chiang Hamangkhung-aphuii rog shii khung phi phro.

²⁷ Chiih-è Hamangkhung-aphuii, hanyie è gethek lubuthek shii thieg pha ji ne, Ragung è now pha ji de thieg ro, nyieliieshii awai bran Chiang è awai miyang duiine Ragung è Hamangkhung-aphuii rog shii khung phi.

²⁸ Gethek ne thieg hanyie è aishii miie pho chiih-è ai miyang ne ho pho rog shii ne Hamangkhung-aphuii è zab ai blia ne wie rek phi. ²⁹ Hanyie shii Hamangkhung-aphuii è gua jong aishii ne awai Dufuii duiine rey yi, ji è ai ne bajo boh haliing shii zab boh abam rey yi phro. ³⁰ Chiih-è hanyie shii Hamangkhung-aphuii è ruang rek, aishii de ho; chiih-è hanyie shii ai è ho, ai è awai rog shii rangsua rai yi, chiih-è ai awai ro biisiie ji ai rog shii thang noh.

Masi Isu shii Hamangkhung-aphuii pha miie

³¹ Hi pha zab miyao è, gethek ne nyie yao pha lei? Hamangkhung-aphuii ne gethek ro arone, hanyie è gethek shii gidieg rek mua phlei?

³² Hamangkhung-aphuii è awai ro Dufuii iphen jia shii de awai è aruii pha gethek shii phi muii! Ai ne awai dufuii gethek shii phimuii ro—Ai ne zab pha manathek ne gethek shii thaluii aphii habey? ³³ Hanyie è Hamangkhung-aphuii è gua pha ji shii nin phlei? Hamangkhung-aphuii awai è yao aishii ne ichiig oi rone yao thiak jong ro!

³⁴ Chiihphado, hanyie aishii the pha lei, Masi Isu

asi ba? Hanyie è iy srane, dinne hòì ne sieng chiih-è Hamangkhung-aphuii ro wad phazoi pha ithua shii rai ne gethek Chiang aishii khung ne rai!
³⁵ Ji-è, hanyie è gethek shii Masi ro bushun pha è yo rek mua? Dinne duhug dinne chi-iyiy dinne dusho shii diig dinne iy yi pha ji è rek ne chiih-è hanyie diig rek mua phlei? ³⁶ Jigigam shii yao, Nathek Chiang è gathek zab pha inai shii buii hà iy pha rek;

gathek shii ne shiishai duiine ua pha rek.

³⁷ Hanyie è gethek shii bushun rek pha ai Chiang è hòì zab shii yangge ro. ³⁸ Ji-è gune nyie magunde izai now nyie magunde: Iy pha ji chiih-è chai, hamangkhliethek chiih-è Hamangkhung pha khothek chiih-è blu, thuh chiih-è doh de airo bushun è ruang arek mua phro, ³⁹ Sohjambling lakhung hà de chiih-è sohjambling pha buchohà de, chiih-è zab zen pha è de gethek ro Ithong Masi Isu Chiang pha Hamangkhung-aphuii ro miie nyie gethek ro ji è de gethek shii yo arek mua phro.

9

Hamangkhung-aphuii nane airo bran

¹ Gune izai yao; chiih-è gune Masi pha ro chiih-è biidiie ayao. Chiih-è Ragung So è de gu khani shii khagi rek muii ro. Ji è gune yao shii biidiie ayao ro. ² Gu è yao mage shii gune bajo duhug rey dun chiih-è gune lubu ne jongdang pha riiedun ³ gui ro bran Chiang è, gui ro isiu nane ifai! Ithek Chiang shii gu ne Hamangkhung-aphuii ro thamai pha iliing hà nane Isu Masi è yo rek muii

pha de nyayang mua. ⁴ Ithek ne Hamangkhung-aphuii bran ro; ai è ithek shii awai Dufuii rab srane chiih-è awai ro biisiie ji ithek shii dong phi; ithek ne izai è sia yi pha; nane ithek ne Hamangkhung-aphuii shiinyiethek mua yi pha; chiih-è ai è awai sbangthek ithek rog shii rab srane ithek shii Iphey phi; ⁵ ithek ne Hebriu bran pha zab è wie riingthek ro; chiih-è Masi de siu è ne ithek ro jad pha ro. Hanyie è zab shii khothek muui pha, Hamangkhung-aphuii airo è biisiie rey bo! Amen.

⁶ Hamangkhung-aphuii ro sbang bia phrone gu ayao ro; Israel pha zab bran ne Hamangkhung-aphuii ro bran asi ro. ⁷ Din ne Abraham ro riingthek pha aniphiing de zab ne Hamangkhung-aphuii ro bran asi ro. Hamangkhung-aphuii è Abraham shii yao, “Gu è sbang rek pha riingthek jine Isakh è rey ruii phro.” ⁸ Ji-è siu è giak pha bran ne Hamangkhung-aphuii ro asi ro, ji pha Chiang shii, sbang shii nuii ne giak pha ani ne Hamangkhung-aphuii ro izai riingthek ro. ⁹ Hamangkhung-aphuii ro sbang ne hì pha miyaogamthek re-è ro: “Rangsua pha ishak gu iidoh wuii shii, chiih-è Sarah ne dufuii um ruii phro.”

¹⁰ Hì zab asi ro. Chiih-è Rebekha ro dufuii nyi ne ò aphuii pha ro, ji ne gethek riing Isakh ro. ¹¹⁻¹² Jishii Hamangkhung-aphuii è Dufuii jia shii ne awai blia rek pha gua jong ro, Hamangkhung-aphuii è bimi shii yao, “Abam jine khuii ro blia rek ruii phro.” Ai è hì yao pha ibi è chiih-è ithek giak pha ibi è ithek ne wie de arek chiih-è buii de arek; chiih-è Hamangkhung-aphuii è gua pha ji ne nyie

ithek è rek pha ji è nuui pha asi awai è ho pha ji è ro.

¹³ Jigigam shii yao pha duiine, “Gu Jakhob shii miie, jishii gu Esau shii amiie.”

¹⁴ Chiihphado, Hamangkhung-aphuii ne awie ro, gethek ne yao habey? Khuchungde asi ro.

¹⁵ Ai è Moses shii yao, “Gu hanyie shii bushun rek yang aishii rek pha ro; Gu hanyie shii wie rek yang aishii wie rek pha ro.” ¹⁶ Ji-è chiihphado, zab ne bran è nyie yang pha ji aluthong phro, jishii Hamangkhung-aphuii shii bushun bie phro.

¹⁷ Jigigam shii yao pha Egyph pha saja shii, Zab pha sohjambling shii gu beng shii yao pha chiih-è gu blu doh yi pha gu è na shii saja rab yi phro.

¹⁸ Ji-è chiihphado, Hamangkhung-aphuii ne ai è hanyie shii yang pha ji shii bushun phi phro chiih-è hanyie shii lawasdai rab yang aishii rab phro.

Hamangkhung-aphuii ro lijieg nane bushun

¹⁹ Jishii na è jia gu shii yao ruii phro, hì ne ji è arone, Hamangkhung-aphuii ne hanyie rog shii khi-èrek ne ijak thoh mua phlei? “Chiih-è hanyie è Hamangkhung-aphuii miiyang shii hanyie è gieng mua phlei?”

²⁰ Jishii hanyie ga nane, gu ijak, Hamangkhung-aphuii shii iidoh chang mua habey? “Khalia pha jariie è imia ne nyie um ne rab phlei? Na ne rab pha bran shii sai mua nebey,” ²¹ Zab pha iidoh shii, Bran è awai miiyang ne khalia shii rab pha ji ne chid muui ne rab phro, chiih-è ò pha khalia è jariie nyi rab, jia yi wie idam shii, chiih-è gai yi thaluii shii chid pha rab phro.

²² Hì duiine Hamangkhung-aphuui è nyie rek pha ji ne izai ro. Ai è lijieg chiih-è airo blu ji doh yi pha yang phro. Jishii ai ne bajo jum chiih-è hanyie yi mua pha um pha ai è lijieg muii pha ji shii zud ne rai phro. ²³ Ai è awai ro biisiie mua yi pha gethek lakhung shii thoi ne gethek shii saro phi pha khirzey bushun chiih-è awai ro biisiie ji de gethek shii thoh ne doh yi pha yang phro. ²⁴ Gethek ne ai è ho pha bran ro, Jew jia è asi pha gai pha brantheek è de ro. ²⁵ Hì ne ai è nyie yao pha ji ne Hosea pha jigigam shii zey ne um ro:

“Bran hanyie guro asi pha ji shii ne

Gu è gui bran rone ho ruii phro.”

Gu è amiie pha jad shii

“Gune guiro miie pha soh rone ho ruii phro.”

²⁶ Chiih-è bajo ithua shii ithek è

yao, ithek ne gu bran asi ro è yao, “thiisa hane isieng Hamangkhung-aphuui ro Dufuii rone ho ruii phro.”

²⁷ Aijaya è Israel Chiang shii yao pha duiine: “Israel pha bran ithek khamuii pha bali igam nyama um ne de, ithek ne Iujia ragia rey bie phro; ²⁸ Hamangkhung-aphuui ro zab sasab ne sohjambling pho rog shii khthiie rek ruii phro.”

²⁹ Hì ne Aijaya è ibi hà yao jong, “Bohblu pha Hamangkhung-aphuui gethek shii giak riingthek athoh arone, gethek ne Sodom nane Gomorah duiine rey dun phro.”

Israel nane muawie

³⁰ Ji-è gethek ne Gaibrantek shii yao, hanyie Hamangkhung-aphuui rog shii giang ruii pha abidiang shii ithek ro migi è ne ai rog shii giang

rey dun; ³¹ Hamangkhung-aphuii rog shii rangsua rai pha Iphey sow pha branthek Hamangkhung-aphuii shii adoh ro, nyie rek ne asow mua? ³² Chiih-è nyie rek ne? Nyieliieshii ithek ne migi shii aluthong pha jishii awaithek mirek shii luthong phlei? Chiih-è ithek kham srane “lubao lakhung shii khamdun” ³³ Jigigam shii yao:
 “Riigbo, gu Zion shii lubao ruii pha ro
 jine branthek shii kham yi pha ro,
 ji pha sak ne ithek shii chiih yi pha rab phro.
 Jishii hanyie magunde aishii migi rek arone aishii
 ne azo yi phro.”

10

¹ Gu khuiinothek nane bumuiithek, gui bran shii ragia rey yi pha nyie khi-èrek ne gui lubu rog shii yang! Nyie khi-èrek ne ithek shii sia phi!
² Gu ithek shii izai yao ithek ne Hamangkhung-aphuii shii iliing è sia; jishii ithek ro misia ne izai khani è asi ro. ³ Ithek ne Hamangkhung-aphuii rog shii branthek ne nyie khi-èrek ne ruii pha ji ne athieg pha rek srane, ji pha Chiang shii, ithek ne awaithek lum ne lumuii rab ne; ji è ithek ne awaishii Hamangkhung-aphuii pha lumuii è giang ruii pha ji shii ne awaithek shii ne aphi.
⁴ Masi è Iphey yi srane jong muii, ji è hanyie magungde migi rek arone Hamangkhung-aphuii rog shii giang rey yi.

Giawo ne zab shii ro

⁵ Moses è hì zey pha ji ne Hamangkhung-aphuii rog shii giang ruii pha ji ne Iphey nuii pha ji è ro, “Hanyie magungde muyungthek ji nuii arone ai

ne sieng ne rai phro.” ⁶ Jishii jigigam shii migi è Hamangkhung-aphuui rog shii giang ruii phro è yao pha ji ne hì ro: “Nane nawaishii asai rabo,” hamangkhung hâne hanyie dun pha lei? (Chiih-è Masi shii ne thazam hanyie è noh pha). ⁷ Din ne hì de nawaishii asai rabo, hanyie yi sohjambling bucho hà dun pha lei? (Chiih-è Masi shii iy dun pha ji è hanyie è hòi ne noh pha). ⁸ Nyie hì yao pha ji ne hì ro: “Hamangkhung-aphuui ro mua ne na moe shii nane na sem shii chiih-è na lubu shii um ro.” Jine gethek yua muui pha mua migi ji ro. ⁹ Gethek è Isu Ithong shii Hamangkhung-aphuui è iy pha ji è hòi phi rone migi rek arone nathek ne ragia rey phro.

¹⁰ Hì ne gethek ro migi è Hamangkhung-aphuui rog shii giang ruii phro; chiih-è gethek sem è yao arone gethek ne ragia rey phro. ¹¹ Jigigam shii yao, “Hanyie magunde aishii migi rek arone azo ruii phro.” ¹² Hì zabjia shii lua ne, nyieliieshii thiisa hâne Jewthek nane Gaibrantek shii yo oi rai phro; Hamangkhung-aphuui ne ò Ithong ro, chiih-è ai è hanyie aishii ho pha ji shii ne bajo khirzey phi ro. ¹³ Jigigam shii yao, “Hanyie magunde Ithong beng yi arone ai ne ragia rey phro.”

¹⁴ Jishii ithek è migi arek arone nyie khi-èrek ne aishii nong pha yao phlei? Chiih-è ithek mua anuui pha nyie khi-èrek ne migi rek mage phlei? Chiih-è ithek è mua ayoi ba arone nyie khi-èrek ne yoi mage phlei? Chiih-è mua ayao ba arone khi-èrek ne yoi mage phlei? ¹⁵ Chiih-è muaphothek shii athoh arone nyie khi-èrek ne mua thieg mage phlei? Jigigam shii yao, “Hanyie è Mua Wie yi ne

wuii ruii pha muapho ne bajo wie ro!” ¹⁶ Jishii zab ne Mua Wie shii anuii ro. Aijaya è yao, “Ithong, hanyie è gethek ro mua shii migi rek phlei?” ¹⁷ Ji-è chiihphado, migi yi mua nuii pha ji è thog phro, chiih-è miyaogam yi Masi ro yua pha ji è thog phro.

¹⁸ Jishii gu sai: Ithek è mua ayoi pha ji ne izai bey? Um ithek è rek—jigigam shii yao:

“ithek è ro pha goh ne zab pha sohnyiak hà yoidun ro:

ithek ro miyaogamthek ne sohjong bsa hà thogdun ro.”

¹⁹ Din ne gu sai: Israel pha branthek ne agao chak bey? Moses awai ne igobi shii yao:

“Gune guro bran è miegriie yi pha gai jad shii ho; gune guro branthek shii miegriie yi pha;

chiih-è bi-ìethék shii khoh ne ithek shii lijieg yi pha ro.”

²⁰ “Chiih-è Aijaya è lububo rek ne yao”

“Gune hanyie gu shii asow pho shii doh yi;

hanyie è gu shii asai pho shii gune aishii dong ruii phro.”

²¹ Jishii Israel pha Chiang shii ai è yao, “Muyua anuii pho chiih-è wiangwe rek pho shii thawuii bo è yao ne zab pha inai gune wad phia ne rai.”

11

Hamangkhung-aphuii è Israel shii bushun rek

¹ Gu sai, chiihphado: Hamangkhung-aphuii è awai ro bran shii snai nebey? Khuchungde asi ro! Gune gui de Israelith ro, Abraham pha riing ro, chiih-è Benjamin jad pha bran ro. ² Hanyie shii

igobi è awai è gua pha ji shii ne, Hamangkhung-aphuii è awai bran shii asnai ro. Nathek ne jigigam thoh shii nyie yao pha ji ne thieg, Elija è Israel pha gidieg shii Hamangkhung-aphuii rog shii khung ne yao:

³ “Ithong, ithek è naro chaigthek shii ua muii chiih-è naro sriie ziao pha ji chuak muii; Gu ne gui jija led sha bie ro, chiih-è ithek ne gu shii ua pha bidiang muii ro.”

⁴ Hamangkhung-aphuii è aishii nyie chang phlei? “Gu è gui shii bran itham mile hanyie è biidiie pha hamangkhung-aphuii Bal shii asia pho shii ruii phro.”

⁵ Hì duiine thuh shii: thiisa hane nyieliieshii airo bushun è Hamangkhung-aphuii è gua pha ùjia led sha bie ro. ⁶ Ai è gua pha ji ne airo bushun ji è rey ro, ai è nyie rek pha ji è asi ro. Hamangkhung-aphuii è branthek è nyie rek pha ji è gua arone, chiihphado airo bushun ne izai asi ara ro.

⁷ Chiihphado nyiega? Israel pha branthek ne ithek nyie sow pha ji ne adoh ba. Hì e ù ibrog hanyie Hamangkhung-aphuii è gua pho mudoh bie bey? Chiih-è gai thek ne Hamangkhung-aphuii è ho pha ji shii khophang rey dun ro.

⁸ Jigigam shii yao, “Hamangkhung-aphuii è ithek ro khani nane ithek lubuthek shii athieg yi pha rab ne ruii muii; thuh pha iidoh shii ithek ne ariig mua chiih-è ithek ne ayoi mua.” ⁹ Chiih-è Dawid de yao,

“Ithek ro michie ne awaithek shii zum pha chiih-è awai ro ubong ro;

Awai thek chiih ruii phro, awaithek shii lago phi ruii phro!

¹⁰ Ithek ro mieg ne thi rey dun phro ji è ithek ne ariig mua phro;

Chiih-è ithek shii awaithek ro diigthek iliing hà zab pha ishak ukhu-òg rab ne ruii muii phro.”

¹¹ Gu sai, chiihphado: Jewthek ne kham mage shii, ithek ne zab muadun habey? Khuchungde asi phro! Nyieliieshii ithek è layog rek, giawo Jewthek shii miegriie yi pha Gaibrantek shii phi phro. ¹² Layog è Jewthek shii ne sohjambling shii bajo bohkhoh khirzey yi ro, chiih-è ithek ro ragung pha nuruii è Gaibrantek shii bohkhoh khirzey phi ro. Chiihphado, Jewthek pha bran ò shii khrab mage pha ishak shii ne dinne ji è bajo muna khirzey mua ruii phro!

Gaibrantek shii giawo

¹³ Gu thuh Gaibrantek nathek shii yao ramuii ro: Chiih-è gune bajo inai è Gaibrantek ro yuapho ro, gune gui blia shii wiangwe rek phro.

¹⁴ Yangne gu ne gui bran shii miegriie pha rab ne, chiih-è gai thek shii ragia nyarek mua phi. ¹⁵ Ithek è snai mage shii, bran bushun ne Hamangkhung-aphuii ro mak è ijak rey dun. Hì ne nyie ga chiihphado, ithek è nuii mage shii? Hì ne iyjong pha chai ro.

¹⁶ Igobi pha iweb dum ji yi Hamangkhung-aphuii shii phi, Chiihphado, zab pha iweb de ai ro rey phro; chiih-è hing pha iriing yi Hamangkhung-aphuii shii phi arone idiphak de ai ro rey phro. ¹⁷ Raig shii hai pha sumaro

hingmuii idiphak yi jo dun shii, chiih-è jabiing pha sumaro hingmuii è rung din phi ro. Nathek Gaibranthek pho ne jabiing pha sumaro hingmuii duiine ro, chiih-è thuh shii nathek ne Jew ro luruakthek pha chai shii gang è thang ro. ¹⁸ Ji-è chiihphado, nathek hanyie yi idiphak duiine jo pho shii ne makhak-ariing rabo, nyie khi-èrek ne nathek ne wiangwe rek mua mage phlei? Nathek ne idiphak duiine ro; nathek ne iriing shii anong gieng ro iriing ne nathek shii nong phro.

¹⁹ Jishii nathek ne yao ruii, “Oh, jishii idiphak ne jo ne guro ùgud rab ro.” ²⁰ Ji ne izai ro. Ithek ne chui dun ro nyieliieshii ithek ne migi arek, nathek thuh de led pha ji ne nyieliieshii nathek ne migi rek. Jishii wiangwe arek rabo; ji pha Chiang shii rum bo. ²¹ Hamangkhung-aphuii è awai idiphak Jewthek shii de akhung phi. Ai è nathek shii khung phi phrone now bey? ²² Ichiih gethek ne riig Hamangkhung-aphuii ne jum chiih-è chieg ro, ai ne hanyie chiih pha ji shii ne chieg ro, jishii nathek airo jum shii idang rai arone airo jum de nathek shii rai phro, jishii nathek arai arone, nathek shii ne jo muii phro. ²³ Chiih-è Jewthek ne migi arek pha ji thoh muii arone, ithek shii ne iidoh awaithek rai pha ithua shii ruii din muii phro; Hamangkhung-aphuii ne ji nyarek mua phro. ²⁴ Gaibranthek ne jabiing pha sumaro muii jo dun pha idiphak duiine ro chiih-è chiihphado, izai sumaro shii yi srane raig pha sumaro muii shii rung. Jewthek ne raig pha hingmuii duiine ro; chiih-è hì ne Hamangkhung-aphuii è jo dun pha idiphak shii awai ro hingmuii shii rung din

pha ji wie ba phro.

Zab shii Hamangkhung-aphuii ro bushun

²⁵ Thiisa hàne ug pha izai um ro, gu khuiinothek, gu nathek shii thieg yi pha yang ro, hì è nathek shii ne khama thieg rone ragia rek ruii phro. Hì ne ji ro Israel pha bran ro lawasdai ne idang pha asi ro, jishii Gaibranthek yi zab Hamangkhung-aphuii shii awuii sbo shii thog pha bie ro. ²⁶ Chiìh-è hì ne khi-èrek ne zab Israelthek ne ragia rey pha ji ro. Jigigam shii yao pha duiine,

“Ragia rek phane Zion è wuii ruii phro

chiìh-è Jakhob riingthek è zab shii awie blia ne zang muii phro.

²⁷ Gu ithek ro layogthek yie shii, gu ithek rog shii sbang rab pha ro.”

²⁸ Nyieliieshii ithek ne Mua Wie shii snai, Gaibranthek nathek Chiang è Jewthek ne Hamangkhung-aphuii ro gidieg ro. Jishii nyieliieshii Hamangkhung-aphuii è gua è ithek shii gua, nyieliieshii ithek ro blangthek, ji è ithek ne airo ijak ro. ²⁹ Hamangkhung-aphuii ne hanyie shii gua chiìh-è hanyie shii khirzey phi pha ji ne awai khani ne alai phro.

³⁰ Gaibranthek nathek ne dohbi ne Hamangkhung-aphuii shii anuii; jishii thuh nathek ne bushun muage ro, nyieliieshii Jewthek è anuii pha rek. ³¹ Ji duiine nyieliieshii bushun nathek shii mua pha ji ne Jewthek è thuh shii Hamangkhung-aphuii shii anuii pha rek, ji pha Chiang shii ithek de thuh Hamangkhung-aphuii pha bushun muage. ³² Ji-è ai ne ithek zab shii ai

bushun doh mua yi pha, Hamangkhung-aphuui è zab anuui pha branthek rone rab muui.

Hamangkhung-aphuui shii chiong

³³ Hamangkhung-aphuui pha bohkhoh ne bajo boh ro! Airo khani chiih-è thieg pha ji ne khama jam ro! Ai è phak pha ji ne hanyie yao mua phlei? Ai lumuui ne hanyie thieg mua phlei? ³⁴ Jigigam shii yao,

“Ithong ro khani ne hanyie thieg mua phlei? Hanyie ne aishii yua mua phlei?”

³⁵ Ji-è ai ne iidoh phi pha, hanyie è aishii nyie phi phlei?

³⁶ Chiih-è zab pha manathek ne ai è rey phro, chiih-è zab pha manathek ne ai è khia ruii phro chiih-è zab ne airo ro. Hamangkhung-aphuui rone idang biisiie rey bo! Amen.

12

Hamangkhung-aphuui ro blia shii chai

¹ Ji-è chiihphado, gu khuinothek nane bumui-ithek, nyieliieshii Hamangkhung-aphuui ro boh bushun gethek shii rek phi, ji è gu nathek shii khung ne yao: nawaithek de Hamangkhung-aphuui shii isieng zid mage bo, airo blia shii phi muui srane aishii sang phi bo. Jine nathek è phi pha ji ne izai misia ro. ² Sohjambling pho duiine nawaishii arek rabo, jishii nawaithek ro khani yi zab lai arone Hamangkhung-aphuui è de nathek ro iliing pha de zab lai ruii phro. Nathek ne Hamangkhung-aphuui è nyie yang pha ji ne nyie wie chiih-è aishii ne sang ba chiih-è hì ne khriig ba ji nyathieg ruii phro.

³ Chiìh-è nyieliieshii Hamangkhung-aphuii ro thaluii bushun ne gu shii phi, ji è gu nathek zab shii yao: Nathek ne nawaithek shii um pha ji è bajo anow rabo. Ji pha Chiang shii, nawaithek è now pha ji shii jum rek bo, chiìh-è nawaithek shii Hamangkhung-aphuii è phi pha ji duiine migi rog shii chua bo.

⁴ Gethek siu jia è bajo ichua um, chiìh-è hì ne zab yo blia rek. ⁵ Ji duiine, chiìhphado gethek ne bajo, gethek ne Masi rog shii siu jia bie ro, chiìh-è gethek ro yo shii siu ne jia bie ro. ⁶ Ji-è gethek ne Hamangkhung-aphuii è phi pha yo lasen ji duiine bushun rog shii blia rek. Gethek ro lasen ji yi Hamangkhung-aphuii mua yao arone, gethek shii um pha migi ji duiine rek bo; ⁷ hì ne blia rek pha arone gethek ne blia rek chid phro, hì ne yua pha arone gethek ne yua chid phro; ⁸ hì ne gaishii lububo rek phi pha arone, gethek ne rek chid phro. Hanyie magunde gai rog shii thang pho ne khriig pha thang bo, hanyie rangsua um pho ne snak rek bo. Hanyie magunde bushun rek pho ne sang ne rek bo.

⁹ Miie pha ji ne zab wie è ruii bo. Awie pha blia shii amiie rabo, nyie wie pha ji shii khoh bo. ¹⁰ Masipho khuiinothek nawaithek chung lua è miie rai bo, chiìh-è nawaithek chung shii ilab phi rai pha yang bo. ¹¹ Blia gang è rek bo chiìh-è siikhad ajo pha arek rabo. Nawaithek zab pha lubu rog shii Ithong shii sia bo. ¹² Nathek ro luthong ne sang ne ruii bo, nathek ro diigthek shii jum rek bo, chiìh-è idang sia bo. ¹³ Na shii um pha ji nawai ijak Masipho è chid pha ji thang bo, chiìh-è naro hò habin athiegho shii hong bo.

¹⁴ Hanyie è na shii diig phi pha ji shii Hamangkhung-aphuii è khirzey lia phi bo aishii khirzey lia phi ne athamai rabo. ¹⁵ Hanyie è sang ji pha rog shii sang bo, hanyie è choh ji pha rog shii choh bo. ¹⁶ Zab pha rog shii ò ruii bo. Wiangwe arek rabo, jishii zum blia shii nuii bo. Nawaishii thieg rone anow rabo.

¹⁷ Bran giak è na shii asi pha rek muii magunde, asi pha iidoh arog din rabo. Zab pha miie shii nyie wie ji rek pha bidiang bo. ¹⁸ Zab pha rog shii Lijjiing rai pha na è zab rek muii pha ji rek mage bo. ¹⁹ Arog rabo, gu ijak, ji pha Chiang shii Hamangkhung-aphuii è lijieg phaji rek bo. Jigigam shii yao, “Gu è rog pha ro, gu è iidoh phi din pha ro, Ithong è yao ro.” ²⁰ Ji phachiang shii, jigigam è yao: “Narog gidiegpho yi chi-iyiy muii arone, aishii michie phi ne chie yi bo; ai gahanghang arone, niing pha phi bo; ji rek phane na è aishii ne wo pha bai fuh phi.” ²¹ Awie pha è na shii ayang yi rabo; ji pha Chiang shii, wie è buii shii yang bo.

13

Soh pha riichai shii nuii

¹ Zabjia ne soh pha riichaithek nuii chid, nyieli-ieshii Hamangkhung-aphuii è ayung pha ne nyie riichaithek arab ro, chiuh-è nyie riichaithek thuh shii ruii pha ji ne Hamangkhung-aphuii è ro. ² Hanyie è thuh pha riichai anuii pha rek arone Hamangkhung-aphuii è nyie yung pha ji shii de anuii pha rek ro; chiuh-è hanyie magunde anuii pha rek arone ai è chua ruii phro. ³ Hanyie è

wie rek pho ne khohphothek shii arum pha jishii hanyie è buii rek ji pho shii rum bo. Nathek ne riichai pha bran è arum yang bey? Chiihphado nyie wie ji rek bo, chiih-è ithek ne nathek shii chiong ruii phro, ⁴ nyieliieshii ai ne nawaithek ro wie rek phi pha Hamangkhung-aphuii ro khiao ro. Jishii nathek è awie pha rek arone, chiihphado aishii rum bo, nyieliieshii airo blu è lago phi pha ji ne izai ro. Ai ne Hamangkhung-aphuii ro khiao ro chiih-è hanyie è buii rek pha ji shii phi pha lago han muui ro. Jishii awie pha chiang shii de rum bo.

⁵ Ji phachiang è nathek ne riichaithek shii nuii chid—nyieliieshii Hamangkhung-aphuii ro lago è asi bie pha, jishii khani pha chiang è de nuii bo.

⁶ Ji ne nyieliieshii nathek de mijin phi, nyieliieshii ithek ro blia zab rey mage shii riichaithek ne Hamangkhung-aphuii ro blia rek phro. ⁷ Phi bo, chiihphado, nathek è ithek shii nyie phi pha um pha ji; nawaithek ro nujo nane nuruii mijintheke phi bo, chiih-è zab shii ilab phi ne ithek shii nuii pha doh yi bo.

Nawaithek chung nong rai bo

⁸ Hanyiejia ne gai iliing shii muruii um ne arai rabo—Natek ro muruii phi pha um pha ji ne nawaithek chung miie rai pha ji bie ro. Hanyie magunde ji rek arone Iphay shii nuii ara ro. ⁹ Muyungthek, “Siulao arek rabo; gai shii aua rabo; agow rabo; gai ro nyie um pha ji ne ayang rabo” zab hì, chiih-è Iphay jia shii gai pha chiang è de rung, “Nawaithek shii miie pha duiine nawaithek ro hadung-haluii pho shii de miie bo.”

¹⁰ Na è gaishii miie pha ji ne, na è aishii awie pha

bliã arek ro; miie bo, chiihphado, zab Iphey shii ne nuii ro.

¹¹ Nathek ne hì rek bo, nyieliieshii nathek ne thieg nathek ro miyem è sieng pha ishãk ne thog sha. Gethek è igobi shii migi rek pha ji è yi ne thuh gethek shii ragia rek pha ne nui thog sharuii ro.

¹² Habiũ ne jong sha bsa ro, inai yang ne ichiih um ro. Cho gethek ne habiũ pha bliã ji ne ruii sha muii haro, chiih-è cho gethek ne migiang yi srane isang hà mak rek rai haro. ¹³ Bran hanyie inai isang shii rai pho shii ne, gethek è wie yao ne wie è rek ne rai haro awie pha asi dinne phuiithiig pha asi, siulao pha asi dinne giichak pha asi, gui pha asi dinne miegriie pha asi ro. ¹⁴ Jishii Ithong Isu Masi ro migiangthek yie ne, chiih-è nawaithek ro layog shii isiie khriig nane chidthek shii gak muii bo.

14

Nawaithek chung achua rabo

¹ Wiewuii bo hanyie yi migi shii zia, jishii ithek ro nujo munowthek Chiang shii ai rog akhiinaing rabo. ² Hanyie bran yi awai migi è nyie magunde chie mua phro, jishii bran hanyie yi migi shii zia arone marerethek chie bie. ³ Bran hanyie è nyie zab chie pha ji ne achie pho shii akhiichai rabo, hanyie è marerethek chie bie pha ji ne zab chie pha bran shii achua rabo; Hamangkhung-aphuii ne jipha bran shii choi ro. ⁴ Gai ro khiaothek shii chua pha ji ne na hanyie lai? Khiao ne bliã wie rek arek jine awai ithong phak ruii phro. Chiih-è ai ne rek muii phro, nyieliieshii Ithong ne aishii nyarek mua phro.

⁵ Bran jia è izai inai ji shii ne gai inai ne miigak ba ro è now, jishii giak è zab pha inai ne ò ro è now. Zab è awaithek khani shii chiih-è nowjong ro. ⁶ Hanyie yi giu è now ne jia inai shii nuii arone ai ne Ithong shii ilab phi phro; hanyie è nyie chie magunde ai ne Ithong shii ilab phi phro, nyieliieshii ai è Hamangkhung-aphuii shii michie pha laso phi, hanyie è khihà chie khihà achie pho Ithong shii laso phi phro, chiih-è ai ne Hamangkhung-aphuii shii laso phi phro. ⁷ Gethek ne gethek Chiang asieng ro, chiih-è gethek ne gethek Chiang a-iy ro. ⁸ Gethek sieng ne rai magungde Ithong ro sieng, iy magungde Ithong ro iy, gethek ne sieng magungde iy magungde gethek ne Ithong ro ro. ⁹ Masi ne iy pha nane sieng pha Ithong ro, nyieliieshii ai ne iy ne hòì din. ¹⁰ Nathek chiihphado, hanyie ne marerethek chie bie phlei? Nyie rek ne nawaithek ro chua pha gai shii phi phlei? Chiih-è hanyie zab chie pho ne—nyie rek ne gai migiphothek shii khiijai phlei? Gethek zab shii ai è chua pha Hamangkhung-aphuii ibi shii riu chid phro. ¹¹ Jigigam shii yao, “Gune izai isieng Hamangkhung-aphuii ro, Ithong è yao, Zab gu ibi shii niing bo, chiih-è zab gune Hamangkhung-aphuii rone yao bo.”

¹² Chiihphado, zab gethek ne Hamangkhung-aphuii shii sasab phi chid.

Nawaithek chung achiih rai yi rabo

¹³ Ji-è, chiihphado, cho gethek gaishii chua pha ji ne gak muui, jiphachiang shii, nathek ne nawaithek yi gai shii kham srane layog shii chiih yi pha khuchung de arek rabo. ¹⁴ Gune Ithong rog shii ò pha ji è Isu è gu shii izai rab phi, nyie michie magungde zea asi ro; jishii branthek è michie yi zea rone migi rek arone, chiihphado jine aishii zea rey dun phro. ¹⁵ Na è chie pha ji yi na khuiino shii diig phi arone, nane miie pha ji shii bajo asi sha ara ro. Masi è bran Chiang shii iy pha ji shii ne nathek è michie chie pha ji re-è gai shii diig arey yi rabo! ¹⁶ Na è wie mua pha ji ne ibeng awie pha arey yi rabo. ¹⁷ Hamangkhung-aphuii ro zab boh riichai jine chie niing pha miyao asi ro, jishii Ragung So è phi pha giang, liijiing, chiih-è lised ji ro. ¹⁸ Chiih-è hanyie magunde ji duiine Masi ro blia rek arone, ai è Hamangkhung-aphuii shii sang yi chiih-e gaithek wie rone yao.

¹⁹ Ji-è chiihphado, gethek ne idang liijiing yie pha chiih-è gethek chung nung ne chuh rek pha ji bidiang bo. ²⁰ Nyieliieshii michie è, Hamangkhung-aphuii nyie rek pha ji shii srobro arek rabo. Michie ne zab chie bo, jishii giak shii diig phi ne kham yi srane layog hà chiih yi pha ji ne nyie michie magungde awie ro. ²¹ Rangsua ruii phane hì ro nawai khuiino dinne bumuii chiih yi pha blia ne ibey achie rabo chiih-è phuii aniing rabo. ²² Chiihphado, na nane Hamangkhung-aphuii pha duchoi shii nyie miyao Chiang yao pha ji shii ruii bo. Ai è chua shii bran hanyie yi ichiig oi pha than pha ji ne, ai ne sang ro! ²³ Jishii hanyie è chie shii than arone, Hamangkhung-aphuii è ai

nyie chie pha jine the ruii phro, nyieliieshii ai è rek jine migi è asi ro. Chiih-è nyiemagunde migi è asi arone jine layog ro.

15

Nawaithek shii asang pha, gaithekshii sang bo

¹ Gethek hanyie yi migi shii gang arone zia pho ro miihanthek shii nong phi bo. Gethek è gethek shii asang rabo. ² Ji phachiang shii, ithek ro migi rab phi pha gethek ne khuiino ithek shii wie sang bo. ³ Masi è awaishii asang yi ro, ji phachiang shii, jigigam shii yao, “Nathek shii gang è makhak-riing pha jithek ne gu shii chiih thog.” ⁴ Jigigam shii nyie zey pha ji ne gethek shii yua pha zey phro, ji pha Chiang shii gethek ne zud ne lububo rek pha Chiang è gethek shii luthong mua mua. ⁵ Chiih-è Hamangkhung-aphuii ro, jum nane lububo rek phi pha lumuii ne Isu Masi khi-èrek pha ji yi ne nawaithek duchoi shii ò now bo. ⁶ Ji-è zab nathek ne ò shii goh jia è Hamangkhung-aphuii nane gethek ro Aphuii Ithong Isu Masi shii chiong mua.

Gaibranthek shii muawie

⁷ Chiihphado, Hamangkhung-aphuii ro biisiie rek pha, Masi è nathek shii nuii pha duiine nawaithek chung de choi rai bo. ⁸ Gu nathek shii yao Masi ro chai ne Jewthek duchoi shii blia rek pha ro, chiih-è awai blangthek shii sbang rek pha ji ne izai rek pha chiih-è Hamangkhung-aphuii ne isiie rone doh yi pha rek phro, ⁹ chiih-è airo bushun ji Hamangkhung-aphuii shii chiong pha

Gaibranthek shii de riichai phi phro, jigigam shii yao,

“Chiih-è ji è gune Gaibranthek shii chiong phi;
Gune nathek shii chiong bai.”

¹⁰ Dinne yao,

“Gaibranthek ne nathek Hamangkhung-aphuii
pha branthek rog shii lised bo!”

¹¹ Chiih-è dinne,
zab pha Gaibranthek Ithong shii chiong bo;
“Zab pha bran aishii, chiong bo!”

¹² Chiih-è dinne, Aijaya de yao,
Jese pha riing ne dong ruii phro;
Ai-ne Gaibranthek shii khothek ruii phro,
“Chiih-è ithek ne aishii luthong ruii phro.”

¹³ Hamangkhung-aphuii ne luthong pha lumuii
rone nathek è aishii migi rek pha ji shii lubo nane
liijiing rog shii zan phi phro, ji è nathek ro luthong
pha jine athodang pha Ragung So è shiie bo.

Phaul lububo rek ne zey pha chiang

¹⁴ Gu khuiinothek nane bumuiithek wo: gu è gui shii than izai nathek de zab ley wie è, nathek shii de zab khani um bo, chiih-è nathek de gaishii yua mua bo. ¹⁵ Jishii hì pha jigigam ne Hamangkhung-aphuii è gu shii chua phi ne gu nathek shii izai miyao now yi pha arum dang pha nathek shii zey phi. ¹⁶ Gaibranthek chiang è Masi Isu ro khiao rek ne, Hamangkhung-aphuii ro Mua Wie yua pha phabi duiine blia rek, Gaibranthek zid shii Hamangkhung-aphuii nuii phi pha Ragung So è aishii zid phi ¹⁷ Chiihphado, Masi rog pha ji è ne, gu è Hamangkhung-aphuii ro blia rek pha ji è gu ne wiangwe nyarek mua phro. ¹⁸ Gune

arum pha chiih-è yao ne Masi è rek phi pha gu Chiang è Gaibrantek shii now ne Hamangkhung-aphuii shii nuii yi pha rek bie phro. Ai è ji rek pha ji ne miyaogamthek nane bliathek ro, ¹⁹ Buangthek pha nane anomuluii pha blu è, chiih-è Hamangkhung-aphuii ro Ragung è. Chiih-è ji è Jerusalem è yi ne Ilyrikhum thog pha zab pha lumuii hà lua srane, gu è zab Masi Chiang shii Mua Wie yaojong ro. ²⁰ Gu è idang khi hà Masi shii aphi ba biisa hà Mua Wie ji yao yang muii ro, ji è gu ne gai è yaojong bsa hàne awuii yang ro. ²¹ Jigigam shii yao, “Hanyie shii ai Chiang ayao ba pha ji shii ne doh ruii phro,”

“Chiih-è hanyie yi ayoi ba ai ne ìd ruii phro.”

Phaul è Rom wuii pha phak

²² Chiih-è ji è gu nathek shii wuii pha rek pha bajo ishak ne galdun. ²³ Jishii gu hì pha ithua pha blia jong arone bajo ishak gu nathek shii wuii ne riig pha rek pha hì ne, ²⁴ gune luthong thuh shii ne rek muii. Gu gui lumuii è sphain hà wuii shii nathek shii si yang muii ro, gu nathek shii dong ne lubo ched pha iidoh shii chiih-è thiisa hà wuii pha nathek nong phi bo. ²⁵ Thuh shii, jimagunde, gune thiisa pha Hamangkhung-aphuii ro blia rek pha Jerusalem hà wuii pha um ro. ²⁶ Mesidonia nane Akhaya pha charchthek pho è Jerusalem pha Hamangkhung-aphuii ro bran shii nong ne thaluii phi pha phak rai.

²⁷ Ji pha muphak jine awaithek ro ro, jishii, izai miyao ne, nathek ne ithek shii nong chid pha blia chak ro. Jew è Ragung khirzeythek Gaibrantek rog shii thang phi pha duiine, Gaibrantek de

awaithek ro muna khirzey ne thang chid phro. ²⁸ Gu hì pha blia jong mage shii chiuh-è ithek è khia pha bang yi zab nathek shii phi marui phro, Gu gui lumuii è Sphain hà wuii shii nathek shii dong ruii pha ro. ²⁹ Gu nathek shii wuii ruii shii gune thieg, gune Masi ro ley khirzey è chua ne wuii ruii pha ro. ³⁰ Gu nathek shii khung phro, gu khiiinothek nane bumuiithek: Gethek ro Ithong Isu Masi nane Ragung pha miie è gu shii rung phi pha Hamangkhung-aphuii è gu rog gang sia phi bo. ³¹ Gu shii de sia phi bo, gune Judea pha migi arek pho è ragia rey pha chiuh-è thiisa pha Hamangkhung-aphuii pha bran de gu blia ji nuii yi bo. ³² Chiuh-è Hamangkhung-aphuii è yang arone gune nathek shii ley lised è wuii mua ne chiuh-è nathek shii wuii ne nathek rog shii michie chie mua phro. ³³ Gathek ro Hamangkhung-aphuii pha liijiing ne, zab nathek rog shii um bo. Amen.

16

Awai ro salamthek

¹ Gu Phoebe nane hanyie è kenchreae pha Charch riig muii pha gu bumuiithek shii jieg.

² Hamangkhung-aphuii pha brantheke è rek pha duiine, bimi shii de Ithong beng shii choi mage bo; bimi è na shii nyie nong pha chid pha um jine phi mage bo; bimi ji awai ne bajo bran rog shii wie ijak rey yi bo chiuh-è gu shii de nong bo.

³ Gu è gu ijak Masi Isu ro blia rek pha Phrisila chiuh-è Akhuila, shii salamthek yao ne thoge; ⁴ ithek ne gu Chiang shii awaithek ro chai ne diig hà ruii muii. Gune ithek shii laso phi phro—Gu

è jia asi, jishii zab pha Gaibran charchthek è de ithek shii laso phi phro. ⁵ Ithek hò shii si pho shii de salamthek ro, Asia pha du-ùa shii zab è igobi hanyie è Isu Masi shii migi rek pha gu ijak Ephaenethus shii de salamthek ro. ⁶ Hanyie è nathek Chiang shii blia nang è rek pha Mery shii de salamthek ro. ⁷ Gu rog shii phat heg hà ò rai pha Andronikus nane Junias ijak—Jewthek shii de salamthek ro; ithek ne guaphasamoythek duchoi shii wie thieg phro, chiih-è ithek ne gu è arab ba pha ibi shii Masiphothek reyjong ro.

⁸ Ithong ro ò pha guro ijak Ambliathus shii de salamthek thoh. ⁹ Guro wie ijak Sthachys shii de, chiih-è Masi ro blia rek pha gethek ro ijak Urbanus shii de guro salamthek ro. ¹⁰ Hanyie ro izai è Isu Masi shii khagi rek phi pha Apeles shii de salamthek ro. Aristhobulus pha haliing pho shii de salamthek ro. ¹¹ Ijak Jewthek, nane Narkhisus haliingthek pha Masipho Herodion shii de salamthek.

¹² Thryphaene nane Thryphoso, hanyie è Ithong blia rek muui pha, chiih-è guro wie ijak hanyie è Ithong blia bajo rek muui pha Phersis shii de salamthek ro. ¹³ Gune Rufus shii de hanyie shii wie è Ithong ro blia rek pha, chiih-è hanyie è gu shii awai dufuii duiine rek muui pha ai amuii shii de salamthek ro. ¹⁴ Asynkhrithus, Phlegon, Hermes, Phathrobas, Hermas, chiih-è ai rog shii um pha zab gai Masipho shii de guro salamthek ro. ¹⁵ Philologus chiih-è Julia è yi ne Nereus chiih-è airo bumuii shii, chiih-è Olymphas chiih-è hanyie ai rog shii um pha zab Hamangkhung-aphuii pha bran shii de salamthek

ro. ¹⁶ Nawaithek chung so khichiug ne salamthek rai bo. Zab pha Masi ro charchthek è nathek shii salamthek thoge ro.

Idoh pha muyua ro

¹⁷ Gu nathek shii khungdang phro, gu khui-inothek nane bumuiithek: riig bo hanyie è che rek pha chiih-è bran migi shii diig phi pha chiih-è nyie na è mua pha muyua shii buii suang rek ruii phro. Ithek è ruang rai bo! ¹⁸ Ji rek pha bran ne Ithong Masi ro blia arek ara ro, jishii ithek ne awaithek ro lui pha blia rek. Jishii ithek ro wie miyaogamthek nane khua pha miyao è ichiig oi pha branthek shii khinrin rek ro. ¹⁹ Nathek è muawie shii chuh rai rone yoi jong ro, chiih-è ji pha Chiang shii gu ne na shii wie now ro. Gu nathek shii è now ro nyie wie shii ne thieg bo, jishii nyie awie pha ji shii a-ìd rabo. ²⁰ Chiih-è Hamangkhung-aphuii è gethek ro liijiing pha lumuii è Sakhathong shii chui srane gethek lai bucho shii ruii muii phro.

Gethek ro bushun pha Ithong Isu ne nathek rog shii um bo.

²¹ Guro ijak bliapho, Thimothi; chiih-è Lusius, Jasan, chiih-è Sosiphathar Jewthek-ijak è nathek shii salamthek thoh ge ro.

²² Gu Therthius, hanyie è jigigam hì zey, Masipho pha salamthek yao ro.

²³ Gu ro muspho Gaius, hanyie ro hò shii Charch rek muii pha è salamthek thoh ge ro; Rajan pha bang ruii pho; Erasthus, chiih-è gathek ro khuiino Khuarthus è de salamthek thoh ge ro. ²⁴ Gathek ro Ithong pha bushun ne nathek rog shii um bo.

Jongsha pha chiong pha misia

²⁵ Cho gethek ne Hamangkhung-aphuii shii bi-isiie phi rai haro! Chiih-è bajo inai è khia ruii pha ji è izai ji ug ne ruii pha duiine, chiih-è gu muyua pha Isu Masi ro Mua Wie ji duiine ai ne gethek shii migi hà chuh è riu pha nyarab mua phro. ²⁶ Jimagunde thuh shii, chaigthek Chiang è izai jine fuang hà yi jong ro; chiih-è idang pha Hamangkhung-aphuii ro muyung è zab pha sohthek shii ìd yi phro, ji è zab è migi rek ne chiih-è nuii bo.

²⁷ Hanyie shii khani ley um pha ne, Hamangkhung-aphuii awai bie ro, ji è Isu Masi Chiang è idang biisiie rek ne rai bo! Amen.

Iwo Surua Mua Wie Pha Bible
The Holy Bible in the Bugun language of India, first
Bible translation

copyright © 2023 The Word for the World International

Language: Kho (Bugun)

Contributor: The Word for the World Southeast Asia

The New Testament in Bugun
published as

IWO SURUA
Mua Wie Pha Bible

The Word For The World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-31

PDF generated using Haiola and XeLaTeX on 21 Feb 2024 from source files dated 31 Aug 2023

02eb8fa0-132d-5640-b9e8-5b17ef13756c